

四庫全書

史部

欽定四庫全書

史部
吳越倫史卷一

詳校官監察御史_臣查瑩

檢討_臣德生覆勘

總校官庶吉士_臣倉聖脉

校對官中書_臣李斯咏

謄錄監生_臣譚世緯

欽定四庫全書

史部九

吳越備史

載記類

提要

臣等謹案吳越備史四卷舊本題宋武勝軍節度使掌書記范垫巡官林禹撰載錢鏐以下累世事蹟依年紀事可補五代史吳越世家之缺原本列年號世系圖諸王子弟官爵封諡表十三州考等目而皆有錄無書蓋已

亡佚後附補遺一卷不詳作者姓氏前四卷
訖太祖戊辰補遺訖太宗丁亥與中興書目
所載前十二卷盡開寶元年後增三卷盡雍
熙四年者正合特卷帙繁簡不同耳陳振孫
謂今書止石晉開運比初本尚缺三卷文獻
通考亦引其說則是書在宋季已無完本矣
錢曾讀書敏求記云今本為鏤十七世孫德
洪嘉靖間刊本序稱補遺為其門人馬蓋臣

所續序次紊亂如衣錦城建金錄醮及迎釋
迦等事皆失載今是書咸備無缺則非德洪
重刊本也至以補遺為馬蓋臣所續別無證
據蓋臣曾撰吳越世家疑辨自序謂曾作備
史圖表豈既補其闕又續其後耶又考陳振
孫書錄解題錢俶之弟儼著吳越遺事有開
寶五年序謂備史亦儼所作托名林范今是
書四卷之末有嘉祐元年四代孫錢中孚紹

興二年七代孫錢渙題跋按子孫錄先世纂輯之書輒以世數冠於名上則以備史為儼撰似得其實又補遺序云不知作自何人蓋用本傳及家王故事為之繹其語氣當即中孚等所題則謂蓋臣所續者非也乾隆四十四年正月恭校上

總纂官

臣紀昀

臣陸錫熊

臣孫士毅

校

總校官

臣陸

費

墀

墀

欽定四庫全書

吳越脩史卷一

宋 錢儼 撰

武肅王

上

武肅王姓錢氏諱鏐字具美杭州安國縣人

即臨安縣

唐武

德中陪葬功臣潭州大都督巢國公九隴八代孫也大
中六年壬申二月十有六日生於本縣之衣錦鄉勲貴
里曾祖諱沛唐宣州旌德縣令累贈吏部尚書左僕射
追封洪勝王曾祖妣童氏追封齊國太夫人祖諱宙累

贈太尉追封建初王祖妣水丘氏累封楚國太夫人追
封晉國九華太夫人皇考諱寬威勝軍節度推官職方
郎中守大府少卿累贈禮部尚書開府儀同三司守太
師中書令追封英顯王皇妣水丘氏累封秦國太夫人
追封趙國太玄太夫人王即長子也先是五年邑中大
旱邑令命道士東方生起龍以祈雨生曰茅山前池中
有龍然不可起起必大異邑令乃止明年復旱又召東
方生起龍將臨池遽指王所居曰池龍已生此家矣時

王已誕數日始誕之夕皇考方他適隣人急走告曰適
過君家後舍聞甲馬之聲甚衆非有盜乎皇考乃馳歸
王已誕矣復有紅光滿室皇考頗怪之將棄於井祖妣
知非常人固不許因小字曰婆留而井亦以名焉王自
幼常與羣兒聚戲于樹陰石上或伐薪必使羣兒聚以
供已隨多少而賞罰焉王嘗憩後山忽一石屹然自立
王志之及貴建功臣精舍遂以石為佛坐樹號衣錦將軍十三年冬十月皇祖
太尉薨將葬之夕大風拔樹於野詰旦術者引靈輅將

就葬所謂皇考曰此拔樹之穴是天啓也宜以葬遂寔之畢術者撫王曰當貴此孫耳王常遊徑山書院有道人洪湮者每迎於門王頗惡之一日自後山僻徑而往湮亦迎焉王問其故湮曰君非常人故預知耳

乙未乾符二年夏四月浙西鎮遏使王郢作亂勅本道徵兵討之時董昌戍石鏡鎮亦募鄉里之衆以副召王王遂委質于董氏始為偏將王入軍中驍勇絕倫為董氏所重

時王年二十四

及董為杭州一日因事遣王之臨安途餘

杭有瞽者善摸骨相集于龍光橋

在餘杭縣

王因請相竟無

一言王一日自臨安還日已暮矣相者復在舊所王遂
贊金請相相者曰旁無人乎王曰獨在斯相者乃引臂久
之嘆曰天下亂矣昇時之內再遇貴人言訖而去旬日
後王復以東帛至餘杭將酬之訪於鄉閭竟絕蹤跡

戊戌五年寇盜蜂起有朱直管曹師雄王知新等各聚黨

數千剽掠於宣歙間秋九月王率本鎮兵討平之以功
聞授石鏡鎮衙內都知兵馬使遷鎮海軍右職

己亥六年秋七月黃巢擁衆二十萬大掠州縣淮南節度使高駢羽檄徵兵討之巢將及石鏡鎮衆纔三百人王謂董氏曰黃巢以數萬之衆踰越山谷旗鼓相遠首尾不應宜以伏兵襲之彼或少却則可逐矣巢前軍二千餘衆果崎嶇而至王率二十騎伏於草莽巢小將單騎先進王親注弩射之應弦而斃伏兵遂起巢兵大潰王謂衆曰此術止可一舉耳大軍必至則衆寡莫敵矣宜乘勝張虛聲以懾之乃進屯八百里

古地名也

途次逆旅遇

老嫗因誡曰後有兵至當言臨安兵屯八百里未幾巢兵果至具如所對賊衆相顧曰向止數騎尚不可當況八百里乎遂不犯境王又伺其後軍殺獲人馬而還歸功董氏淮南高駢聞而偉之

庚子廣明元年冬十二月黃巢犯闕僖宗入興元杭州始建八都

臨安縣曰董昌王副之餘杭縣曰陳晟於潛縣曰吳文舉鹽官縣曰徐及新登縣曰杜稜唐山縣曰饒京

富春縣曰文禹龍泉縣曰凌文舉各聚千人以衛鄉里

既而高駢召董氏赴廣陵王亦從焉時駢熟視王顧左右曰此人他日爵祿必遠過於我時駢將大舉討巢命董氏從行王謂董曰竊窺高公無討賊之志苟從其行功效不立是同坐罪宜以捍衛鄉里為辭董然之告於駢駢因禮而歸焉是月黃巢自稱大齊皇帝

辛丑二年春正月僖宗幸蜀改元中和勅高駢為東面行

營都統起師討巢駢竟不出兵秋八月己丑夜星大如杯椀交流如織至丁酉乃止

西晉之末五星互經天縱橫無常未幾五胡之亂驗矣

九月詔授董昌杭州刺史授王都知兵馬使太子賓客

壬寅中和二年秋七月浙東觀察使彭漢宏姓犯王諱以天子

西幸乃遣弟漢宥馬軍都虞候辛約率兵二萬營於西陵將圖浙西既燒漁浦劫富春兵勢甚盛董氏遣王率

師禦之是月十二夜將渡江而星月皎然兵不可渡王親掬江沙而吞之祝曰吾以義兵討賊天將見助願陰雲蔽月以濟我師俄而雲霧四起咫尺晦暝王大喜即先渡江竊賊號縱火斫其營精兵繼至破賊殆盡漢宥卒約走之擁入溝塹士卒大半溺屍骸相枕冬十月漢宏又率衛嫫等四州兵七萬餘人遣登高鎮將王鎮領之營于江干連營相屬王率儒童鎮將徐靖浙江都遊奕使阮結啣枚宵濟復大破之王鎮奔諸暨王獲漢宏

所署主將憲官偽勅二百餘道俘馘萬計兵甲生口稱
是歸漢宏所掠民間妻女于鄉里者數百人是月詔王
兼侍御史

癸卯

三年春三月漢宏又分兵於黃嶺巖下貞女等三鎮

及山洞凡九十三所皆千餘人以圖大舉王率八都兵
自富陽以趨之破黃嶺巖下及山洞三十餘所生擒貞
女鎮將陽元宗巖下鎮將史弁等仍焚其兵甲夏四月
漢宏自領兵屯諸暨古剝嶺至於亭山龜山之下王先

攻諸暨獲糧二萬餘斛旋破古剝嶺亭山等寨賊皆宵遁五月漢宏又遣將何肅黃珪等率本道排門軍營于蕭山諸暨等處王親禦之破賊一萬餘人生擒都虞候章公直餘皆走之冬十月漢宏又遣弟漢容與辛約巴立李萬敵等會溫處等州兵洎白丁十萬餘衆從蕭山西陵大出戰船以謀宵濟王自新沙由漁浦而攻之戮何肅等遂趨蕭山是月戊午王親與漢宏遇自午至戌破賊大衆漢宏易服持膾刀而遁時軍中有異其狀者

將擒之漢宏誑曰我宰夫耳遂伏于亂屍之內得免次日漢宏復舉餘黨四萬人來我師乘勝大敗之斬漢容辛約及招討判官譚昇都知兵馬巴立先鋒李萬敵仍獲漢宏偽淮海招討使印一紐戰艦五百艘馬四千蹄兵甲萬計俘馘千人漢宏宵遁歸越

甲辰四年春二月婺州王鎮執刺史黃碣請降於王漢宏聞之使其下婁賚殺鎮而代之夏四月浦陽鎮將蔣環會我師攻婺州生擒婁賚而還未幾勅命中使焦居燭

為杭越通和使俾其改過王遂班師以待之漢宏因殺
王人密徵水師於温州刺史朱褒出戰船習於望海以
史惠施堅實韓公玟領之復圖水陸並進秋七月勅授
王國子祭酒兼御史大夫右千牛衛將軍冬十二月朔
天子南郊改元光啓

乙巳光啓元年春正月僖宗發蜀三月至京師冬十月授
王檢校散騎常侍右武衛將軍十二月監軍使田令孜
進逼帝如鳳翔

丙午二年春正月田令孜劫駕如寶鷄二月至興元冬十月大將朱玫立襄王為帝

書朱玫僭立煬為帝以正其反逆之罪也

是月一日王謂董氏曰除惡務去根本不爾當為後患願以全師討之董曰然王即日進師以諸都兵馬使阮結守梅市監陣使錢爽守雙童過後使駱團守平水降將使章可周唐晟王公備等守蘭頭江海遊奕使崔則守羊石是月辛亥王親率師自諸暨趨平水導山路至

曹娥塋癸丑破韓公玟因與朱褒遇水師戰婢皆焚而溺之甲寅進屯豐山梅城鎮將施堅實執漢宏右直將張師及歸于王丙辰進拔越城漢宏走台州辛酉戮漢宏妻母弟姪及其黨史惠史侃都虞候蔡約於軍門十二月丙午台州刺史杜雄執送漢宏至命斬于會稽市漢宏斥刑者曰吾廉察也非汝輩可殺吾嘗夢手捧金錢殺吾者錢公也乃請王親刃焉

漢宏兗州使院之小吏也尋為大將領本州兵以禦

黃巢寇遂殺將首刼輜重而叛詔忠武軍討之不利復命前濠州刺史崔鐔招攜之宏遂降授宿州刺史會浙東觀察使柳瑫以賄免官皆恥代之議者以宏降將也以降將代賊吏宜矣乃除之既有七州之地復萌逆節常會客酒酣謂衆曰天下喪亂金刀之識焉知非僕遂撫掌大笑後又會于使院有羣鴉噪庭樹上因使伐木有座者言此樹有年矣鴉噪乃常耳願勿為怪宏曰我將斬白蛇豈止此樹耶遂伐之又

嘗構別第窮極雄壯一日有飛帛書署其門曰漢宏
是賊豈宜造此大宅宅之中堂懸一錦傘守衛甚謹
即夕失之人皆以為任俠所獲及舉兵至西陵將謀
渡江乃禱於江干俄有一矢墜其前莫知所來宏頗
惡之既敗棄其母挾妻而奔就執之日董庶人讓之
宏曰成即是敗即非自古何有不敗之家不亡之國
僕射有名將良策宏無之以至於此何必太讓哉
既而儒童鎮將徐靖以俘掠居人戮之於市北關鎮將

彭城孟安

姓犯王諱故號彭城

與弟孟宿輒啟府庫散其本部仍執

廉使牌印王因饗於擊塲遂責之孟安即席謀王立斬以徇時孟宿部兵屯於外王親撫之悉有其衆越人及諸將皆推王為主王固讓董氏董遂權莅於越杭人復請王代董氏時浙西節度使周寶承制以王權知杭州軍州事兼杭州管內都指揮使是月赴本郡錄其事以聞詔授王檢校尚書

丁未三年春正月帝在興元勅授王杭越管內都指揮使

上武衛大將軍充杭州刺史董昌為越州觀察使

凡國王自陪臣以下所授官爵自貞明戊寅以前制
用詔勅皆自間道而至戊寅以後南康貢路阻絕則
皆航海而至皆出其迎授徐審德本日月而書之他
皆倣此

三月潤州客司軍將

彭浩姓犯城王諱

逐節度使周寶出於毗

陵推度支催勘使薛朗為主仍火其城是月帝至鳳翔
夏四月六合鎮使徐約攻陷蘇州淮南高駢為其下畢

師鐸所幽乃召宣州觀察使秦彥為主五月王命東安
都將杜稜浙江都將阮結靖江都將成及率兵討薛朗
初杭州山賊朱直為亂遂募八縣鄉兵以討之因為
八都臨安董昌首之今東安浙江皆其數也其諸都
地名都號首將名姓並見於前

六月師次陽羨與賊將李君旺遇大破之獲船八百餘
艘秋九月秦彥殺高駢

駢擁兵叛命信用妖人自取亡滅秦彥與畢師鐸出

師屢敗疑駢黨內應遂殺之高駢之事豈非佛氏所謂輪迴果報者乎易曰積善之家必有余慶積不善之家必有余殃曾子曰出乎爾者反乎爾者也若高駢所得猶未足以償數千人之怨纔足以見天道好還之不差忒耳

是月詔加王檢校戶部尚書至日王師次禹城斬賊將丁重德屬將趙君度走之遂進攻常州丁從實棄城宵遁

從實浙西小將也有微功於周寶故用為是郡郡人
以為暴虐號為丁滅門及是奔于海陵鎮鎮使高霸
及楊行密同入海赴高駢之難從實竟為行密所害
十月周寶遂歸于王王以屬郡禮具橐韉迎之於郊仍
舍于樟亭驛是月廬州刺史楊行密始入淮南十一月
十二日文穆王生十二月命杜稜為常州制置使遣阮
結等進攻潤州是月乙未周寶卒

寶字尚珪曾祖侍選唐滄州魯城令幽薊之亂魯城

以一邑拒寇為賊所害祖光濟左贊善大夫依侯希
逸於平盧軍為衙門將每行陣獲攻魯城者必殺之
以祭父父懷義以武藝為韓臯所重累官至工部尚
書天德軍使寶即第三子也以父廕為千牛備身尋
求去職依天平軍帥武宗三年徵方鎮有才器者入
宿衛寶因隸右神策軍出為良源鎮將有戎政本軍
表聞授右廂都押衙馬步軍知軍事大將軍出涇州
聚糧二十餘萬斛黃巢之亂移鎮海軍節度使僖宗

幸蜀加授右僕射檢校司空中和二年拜同平章事
時朝廷以丞相王鐸率諸道兵復長安以寶為天下
租庸副使兼管內營田使五年特授進檢校太保兼
侍中進封本郡王至是以疾薨年七十四子璵嗣比
唐制武選以馬上擊毬較其能否有置鐵鉤於毬杖
以相擊寶嘗遇此選為鐵鉤所摘一目睛突寶即取
而吞之復擊毬遂獲頭籌授涇原勅賜一木睛以代
之木睛不知何木視之亦明置水中無所礙真睛矣

一日早起盥漱其睛墜水盆中侍姬竊笑寶怒曰我瞎漢何足笑也遂殺之潤州衙軍以軍額號鎮海軍蓋宿舊也寶復置親信號決勝軍處之後樓使其子與揔之衆號為後樓軍其衣食糧賜數倍於鎮海士卒頗有怨望因恣橫于外一日會客于後樓即席有言其事者則殺之而薛朗與鎮海將彭城浩素友善遂以寶意示之且誠其戢下浩聞之憤曰可以免禍者不過反耳是夕遂率鎮海軍叛乃推朗為主寶聞亂

率家屬跣襪拓芙蓉門召後樓軍曰後樓軍兒即能
救我乎後樓聞之亦同叛焉寶遂奔高駢與寶夾江
為鎮頗有嫌隙及奔駢遺書曰竊承走馬以及奔牛
遣送黃蘗一瓶葛粉十斤以表蘗粉之意寶在涇原
至於金陵多會賓客歡宴終日後庭樂妓百餘人水
陸餽饍日極豐美以撫養欠均以致叛亂得非驕奢
蠹其福祿而使然乎

戊申
文德元年春正月孫儒殺秦彥畢師鐸

彥等因高駢信妖慄酷遂亂殺駢并殺駢子弟甥姪
有一婦人臨刑戟手大罵曰我必訴於上帝使汝等
後日舉家戮殺一如我今日至是果如所言

是月駕在鳳翔丙寅我師克潤州生擒薛朗而還王命
剖心以祭周寶

彭城

浩走之王命阮結為制置使又命築

嘉興縣城二月駕還長安大赦改元文德三月朔日有
蝕之僖宗疾革命立壽王為太弟帝崩太弟即位是為
昭宗詔加王檢校司空夏四月孫儒入淮南陷揚州楊

行密奔海陵復歸廬州秋九月王命從弟鉅率兵討徐約於蘇州盡驅州人以守城皆文其面曰願戰南都有軍事衙推陳車

車本二名上字犯忠獻王諱

謂人曰南都者蓋都邑

之稱杭州其終建國乎冬十一月楊行密攻殺宣州刺史趙鐸而有其地

己酉龍紀元年春正月朔改元三月我師破徐約於蘇州約奔入海中箭而死

約曹州人初從黃巢攻天長遂歸高駢用為六合鎮

將浙西周寶子婿楊茂寶為蘇州刺史約攻破之遂有其地而制度不軌叔王貢賦至是而滅宜哉

王命海昌都將沈粲權知蘇州事夏四月丁丑命築安衆營於臨安五月甲辰潤州阮結卒

結字韜文錢塘人也杭州建八都結亦副焉中和二年以征漢宏有功授散騎常侍光啟三年征常州又平潤州累授戶部尚書四年充潤州制置使尋遷刑部尚書初徐約之黨三千餘人來降結撫之失所因

散香於甘露寺輒為所叛卒投于江遂成疾而卒年

四十六

王以其弟右驍衛將軍阮綽領其本郡仍命成及代之
及盡誅其叛卒秋七月勅授王金紫光祿大夫檢校司
空本州防禦使冬十月勅除給事中杜儒休為蘇州刺
史以沈粲為制置使十一月帝南郊更名畢改元大順
是月宣州楊行密遣將李友陷我毗陵執杜稜而去
初李友攻毗陵鑿穿地道而入兵甲俱以土中夜入

于稜之寢室因執稜于卧榻而去

十二月淮南孫儒遣其下

彭建封

姓犯王諱

帥衆陷我潤州

成及奔歸

庚戌

大順元年春正月戊子朔皇帝受冊尊號大赦夏四

月勅遣使徵兵討李克用因路遠事遂寢秋七月常州

李友陷我姑蘇制置使沈粲害刺史杜儒休及兄延休

而奔於我王以其失備復害刺史將欲誅之粲遂奔孫

儒

初沈粲之攻杜儒休儒休曰勿殺我與爾金粲曰殺
爾金將焉往遂殺之儒休延休異母兄弟也同日而
生至是同日而死異哉非聖人不能知其所以然也
是月楊行密遣將張行周為常州制置使八月制加王
吳興郡開國男閏九月孫儒復遣彭城建封攻毗陵殺張
行周而復困姑蘇是月王命築新夾城環包氏山洎秦
望山而迴凡五十餘里皆穿林架險而版築焉王嘗親
勞役徒因自運一甓由是驂從者爭運之役徒莫不畢

力冬十一月孫儒陷姑蘇李友奔常熟十二月孫儒歸淮南仍以沈粲為制置使是月勅遣使高品賜官誥加王檢校司空同平章事

辛亥二年春正月孫儒自淮南復入姑蘇將乘勝以圖我

王出舟師以禦之儒遂絕南顧夏四月彗星見大赦天下秋七月城東安鎮冬十二月孫儒燒掠蘇常遂逼宣州因圍楊行密行密遣使求救于我王出糗糧甲兵以助之是月常州甘露鎮使陳可立據本州王遣師平之

士景福元年春正月丙午朔大赦改元二月命從弟鉉
為蘇州招輯使夏四月初陞杭州為武勝軍授王本軍
防禦使六月王出師會宣州兵敗孫儒于宣城行密斬
孫儒傳首京師宣州以沈粲歸王戮之于市而行密因
有廣陵焉

初楊行密軍師張某或曰李某頗善占筭前一日謂
行密曰明日大水亭午可獲孫儒時畏日曦赫儒兵
正勝人皆哂其言及詰旦西北有雲大如箕漸漸彌

漫俄而澍雨大水暴作儒謂衆曰城中大水將及我
諸營自顧無相救也俄而水深丈餘城中知其號令
乃徑出兵以擊儒營他皆不救因獲儒軍師之言果
驗

是月泉州王潮攻陷福州殺范暉而有其地

亦作鮑姓乃陳巖之子婿也巖為福州數年而卒以
暉繼之至是為王潮所害時福州嘗有僧記之曰潮
水來岩頭沒潮水去矢口出矢口蓋言將來繼潮之

人也

癸丑

二年春二月楊行密以其將田頔牧宣州安仁義牧
潤州夏閏五月詔授王本軍團練使蘇杭等州觀察處
置使進封彭城郡開國侯食邑七百戶秋七月丁丑王
率十三都兵洎役徒二十餘萬衆新築羅城自秦望山
由夾城東亘江干洎錢塘湖霍山范浦凡七十里咸通
中京師有望氣者言錢塘有王者氣乃遣侍御史許軍
中使許計賁壁來瘞秦望山之腹以厭之使迴望氣者

言必不能止又郭璞著臨安地志云天目山前兩乳長
龍飛鳳舞到錢塘海門山起橫為案五百年生異姓王
至是果驗

率十三都者八都之外有紫溪保城龍通王泉三鎮
是為十三都

九月制授王鎮海節度浙江西道觀察處置等使潤州
刺史

先是今年三月詔以鳳翔宿衛耀德都頭李鋌授特

進同平章事領浙西差朝廷以李茂貞徹海王忠其
黨將奪之權乃有此授而丹陽已為淮人所有鉦不
能至所治至是命王時議當之又周寶莅丹陽州人
凡有期必曰待錢來斯之應也蜀禪月大師休公嘗
上詩曰今日再三難更讓識辭唯道待錢來明矣

甲寅乾寧元年春正月乙丑朔大赦改元二月王命成及
權蘇州刺史三月制王自光祿大夫檢校司徒進充本
道營田招討鹽鐵制置發運等使夏五月勅遣中使

彭城

延鉅

姓犯王諱

特授王開府儀同三司同中書門下平章事

六月勅遣中使賈居蟾賜王私門立戟

乙卯

二年春二月進封王開國公食邑一千戶是月威勝

軍節度使董昌僭稱皇帝建元順天國號羅平

年號或云天冊或云天聖皆非也江東羅諫議隱撰
吳越行營露布曰羅平者啓國之名順天者建元之
始又曰以將門稱天冊之樓以會府為宣室之地明
矣

昌以書告王其所稱云權即羅平國位印文曰順天治國之印王得之名賓吏以議曰董氏昔吾鄉黨也今吾隣藩也其豐功茂績崇名厚祿又吾所以贊成也今採聽妖妄遂圖僭亂吾已受朝廷將相當徵兵以討之然惡跡方炳庶或能改吾先馳書以勉之救其覆族之禍衆悉稱善乃遣賓屬沈滂率將吏數百人移書以諫之曰與其閉門作天子與九族百姓俱作塗炭不若開門作節度使終身富貴無憂也及今後悔尚可及矣昌竟

不聽王乃表聞之仍又親率兵至迎恩門望樓再拜且
諭曰大王奄有數州位兼將相非不貴矣非不富矣一
旦顛倒兵柄改易臣節自貽伊戚禍不旋踵今率諸州
兵至城下以俟大王改過苟不見聽則天子赫怒羽林
黃頭濟江而至襲大王之城非唯大王有累卵之危實
鄉黨生靈皆歸鼎爨矣禍福之道唯大王擇之昌於是
送犒師錢二億萬仍執妖人應智王溫室巫姬阿韓掾
史吳瑤秦昌裕至於軍門且言待罪于天子王遂誅應

智等而還復表其事時越州都指揮使馬綽指揮使駱
團出降俄而詔王討昌又勅遣中使高品李重密來勞
我師仍削奪董昌官爵

詔曰夫雷霆霜雪上天降以成物明賞飭法哲王垂
以理人是則陽春不可以獨為歲功仁恕不可以專
為君德威刑之作其在茲乎朕以耿躬祗膺大寶奉
祖宗之丕訓荷天地之洪休八年于茲一日無怠遜
於志者既求諸道逆于心者必本於情苟懲誠之不

明懼典章之斯廢威勝軍節度使隴西郡王董昌出
於行伍屬遇艱難權握兵戎位崇將相器纔盈而自
覆鼎必折而遂傾因憑生祠輒有狂計假陳妖異惑
亂邪巫鼓噪危樓偽為建國不思理代徒生犬吠之
音欲就叢祠妄舉狐鳴之兆賴浙西節度使錢諱與
諸司等皆忠誠憤激壯節堅高始以逆順之理飛章
諭之而不悟次以攻伐之謀盟約脅之而不回至于
率兵直以摩壘雖復假言幻惑止遏亮邪終為閉壁

偷安不便束身歸罪是其陰詐猶欲張皇魚戲鼎而
雖亦可哀娘拒轍而終為不率天討有罪鬼得而誅
其董昌在身官爵並削奪仍委諱進兵攻討越州城
士庶且多寧無勇敢之徒善以功名自許如有梟戮
生擒董昌者授以三品正員賞錢一萬貫如先有官
者超三資酌獎如是董昌威制曾助妖謀幡然改圖
轉禍為福有所自効者罪並不問賞則與之於戲惡
殺好生君人令德仗順伐逆武夫令猷鳴鼓而攻既

非獲已奮戈而起亦宜慎諸勿發勿焚無誤無失罔
俾觀聽謂我黷武而勤兵也

夏四月辛卯蘇州雨雪乙巳皇考太師薨六月制授王
檢校太傅彭城郡王兼浙江東道招討制置兩浙鹽鐵發
運等使是月王起師討董昌秋七月制授王起復雲麾
將軍上金吾衛大將軍員外置同正員是月帝幸莎城
旋至石門鎮八月車駕還京於是董昌求援於淮帥楊
行密行密遣將臺濛等困圍姑蘇以應昌冬十月行密

又遣安仁義田頤等攻我鎮武昌遣裨將陳郁鍾福朱
黨屯於香嚴寺又遣李蕙崔溫屯于石侯

香嚴石侯
皆地名

王

命武勇都知兵馬使顧全武馬步軍都知兵馬使王球
率兵往逐之遂戮李蕙崔溫等未幾昌復構湖州刺史
李師悅率兵四千餘人侵我封境又遣徐淑困我嘉禾
王命內衙都虞候方密襲之不克更命顧全武率所部
禦之因破烏墩光福二砦而府城東接大江賊不得聚
然沙路平漲賊之游兵得以來往王謂全武等曰賊若

有我江塢襟帶甌越則不可當也汝善禦之十一月衢
州刺史陳儒卒弟岌嗣時顧全武遣偏將孟寶蔣燭率
兵屯于西陵是月勅王依前起復檢校太傅兼侍中加
食邑一千戶是歲終郊封胥山伍子胥為惠應侯

封胥山祠

不詳詔命日月羅代集有碑云三年閏三月則知
詔下之明年為碑今按長厯乾寧三年今甘崇耳

丙辰三年春正月勅授費州刺史高彥夷州刺史沈夏並

檢校司空是月安仁義出戰船從湖州將渡江以應董
昌王命武勇都指揮使許再思等禦之仁義竟不敢渡

然沙路之患未弭乃祭江海而禱胥山祠一夕驚濤沙路悉毀江壩一隅無所患矣昌又遣徐珣李玄賓等據肅清四朴九鄉之地王命顧全武王球擊之徐珣等來降昌又遣將湯舊領兵守石城袁邠領兵守永寧時昌鎮遏使朱威與賀蘭風招輯使孫仲殷等並投款于王且為越軍所襲朱威等由海道而至二月王命顧全武許再思自西陵趨石城與湯舊遇遂破石城

去越城僅三十里

生擒其黨六百餘人湯舊等走還昌不能援三月我師

復攻餘姚袁邠因大戰賊黨逃溺者相半而明州刺史黃晟遣指揮使梁從咍率兵來應我師袁邠堅壁自固昌益兵以救之顧全武遣武勇隊主

彭城

彥章截其衝要

生擒賊將徐宣斬首二百餘級昌又遣暨陽鎮將陳都

自南秦

秦一作秦

了口至于富陽漁浦等處屯聚王命王球

等擊之仍遣婺州兵及諸鎮兵以應之時陳都率其黨千餘人來降夏四月我師執袁邠及偏將潘薦等凡二千餘人王以朱威復為永寧鎮使是月顧全武進圍越

城而楚武王馬某始有湖湘之地

王馬姓名犯宣祖廟諱故以謚易之

五

月辛巳董昌親閱戰于五雲門仍懸玉帛以誘我師顧全武許再思等奮擊之其黨大敗昌愕視而退至是始懼自去其帝號

初城中有言王師雄壯強盛者輒怒而斬之有言王師兵疲而糧絕者則喜而賞之于是親閱我師奮擊始大懼而退

次日王命分兵進攻以顧全武充諸軍都虞候東面都

知兵馬使與指揮使孟寶等攻五雲門王球充右副指揮使與蔣熾攻亭山及申光門陳章充右副指揮使與錢顏攻關子門許再思充馬軍都虞候北面都知兵馬使攻昌安門駱團充西面都指揮使攻迎恩門是月癸未越城將拔而臺濛等陷我姑蘇刺史成及被執王乃召全武議將分兵西陵以脩北寇全武上言曰賊之根本繫于甌越豈以失一姑蘇而遂遁天討願先拔越城然後復茂苑未遲王從之乙未董昌猶據牙城拒之王

紹昌曰奉詔令大王致仕歸臨安昌乃送牌印而出顧全武遣上武勇都監使吳璋執昌至而斬之越州平王命散府庫金帛以賞將士開倉廩以賑貧乏又斬偽宰相李邈蔣環等十餘人以下脅從者悉宥之

董昌臨安人也始為土團軍破山賊有功為石鏡鎮將尋遷杭州平

彭城

漢宏復除越州其始起餘杭洎

領甌越頗有廉儉之度累授開府儀同三司檢校太尉同平章事封隴西郡王時屬京師喪亂文籍多亡

越州有裴氏書樓昌黎取其書以貢授諸道採訪圖籍使既而恣為淫虐凡按罪人無輕重枉直必命骹子使之對擲勝者宥之否則殺之而案牘不復叅決但一槩誅戮而越州有白樓門門外即殺戮之所地為之殷守閤者嘗夜聞鬼哭凡軍中制度多所改易隸中軍者衣黃布背印威儀二字隸外軍者衣白布字號如之凡所器玩無小大皆號以元字軍中文其臂者亦如之識者以為元者錢之文也皆當歸錢氏

昌建生祠諸郡置土馬有誑馬嘶發汗者畢被賞又立將吏木偶悉用長釘以釘其足曰使三二百年免有顛踣末年盈滿遂圖僭亂故妖人應智等竟以幻惑進愚民俗吏致龜魚符印者日以百數又集無賴之徒皆斷腕劈耳號曰感恩都以脩腹心及議立國號有客使倪德儒語昌曰中和辰巳間越中嘗有聖經云有羅乎烏主越人禍福敬則福慢則禍於是民間悉圖其形以禱之今觀大王署名與當時烏狀相

類乃出圖示昌昌欣然遂以為號僭立之際年月日時皆用邛從妖言也或云古讖書云漢東岼上重日生昌以名應之故悉用邛以符日出之義也初昌議立會稽令吳繇諫曰大王不為真諸侯以傳子孫欲為假天子以取滅亡也昌族誅之山陰令張遂曰浙東雖領六州大王稱帝彼不從徒守孤城為天下笑昌又殺之節度副使黃碣惡其惑亂屢諫碣家奴有致印於昌者碣將殺奴奴遂投昌匿之碣乃密致書

於管權官李滔曰順天將期一統其如之何以愚計
之針豈為稍耶有竊其書送昌昌集名議之碣曰今
王室雖衰天人未厭大王興於畎畝受朝廷厚恩位
兼將相富貴極矣奈何一旦忽為滅族之計昌詬之
曰爾賊負我好聖明時三公不能待先求死耶遂斬
碣首投諸廁中仍族誅之而李滔亦遇害識者以昌
言先求死者蓋相繼之兆也自王師攻討而遷延未
克者以其姪真小得衆志耳俄而真與小將刺羽不

和譖于昌而殺之衆由是解體作亂盖天之所廢然也自前年仲冬不雨至是月乃雨昌暴虐如是今平之乃雨

秋七月李茂貞犯闕帝幸華州八月勅授王檢校太尉兼中書令加食邑一千戶實封一百戶賞去偽之功也仍遣供奉官甯全道賜王旌節又遣中使韓勣範來宣諭將授王越州王固讓遂除宰相王搏亦作搏出鎮越州搏以王有大勲宜當所授復固請辭冬十月勅改越州

威勝軍為鎮東軍授王領鎮海鎮東等軍節度使十一月戊子湖州刺史李師悅卒子繼徽嗣

師悅要節制於朝廷制授忠國軍節度使使臣未及境師悅已寢疾使人覘之回報旌節已至蕪湖師悅聞之喜不及拜命而卒

是月安仁義由南蕩率餘黨攻東陽刺史王壇堅壁自固

丁巳四年春正月帝在華州是月王命行軍司馬杜稜都

監使吳璋率兵救東陽安仁義復攻睦州一夕大風雨賊衆驚擾而遁夏四月命顧全武與王弟鎮并武勝軍都指揮使沈夏陳璋高過許再思等率兵自海道以救嘉禾時諸將皆欲緩進惟全武請倍道兼行王從之一日師次嘉禾圍逼已久城中莫知所之遽見我旗號皆大悅賊亦謂之神是日遂內外夾擊擒賊將李宗禮偏將顧金等二十餘人俘馘不可勝計乘勝大破賊寨十有八所又擒賊將魏約張宣楊燭閻建等士卒三千餘

人嘉禾平全武等又乘勝逐田頽于驛亭埭頽由吳興而遁於時大水我師逐之斬馘沉溺者僅于十里

初安仁義田頽之攻我也乃請淮帥楊行密率兵親至攜一僧袒肩者來視王城僧曰此腰鼓城也擊之終不可得又聞城中鼓角之聲曰錢氏子孫皆當貴盛未可圖也行密乃先歸而安仁義田頽駐屯于北郊復有電火焚頽營震折威鎗由是俱敗天使然也六月己酉王如東府受鎮東節鉞

先是勅命到時王謂衆曰淮寇未殄吾不敢奉命至是方行

秋七月庚寅王至自東府命顧全武率師復姑蘇八月我師屯崑山既而勅王起復加食邑一千戶又遣中使焦楚錚賫鐵券至

券文曰維乾寧四年歲次丁巳八月甲辰朔四日丁未皇帝若曰咨爾鎮海鎮東等軍節度浙江東西道觀察處置營田招討等使兼兩浙鹽鐵制置發運等

使開府儀同三司檢校太尉兼中書令持節潤越等
州刺史上柱國彭城郡王食邑五千戶實封一百戶
錢某朕聞銘鄧騭之勲言垂漢典載孔惺之德事美
魯經則知褒德策勲古今一致頃者董昌僭偽為昏
鏡水狂謀惡跡淬染齊人爾披攘亮渠盪定江表忠
以衛社稷惠以福生靈其幾也氛祲清其化也疲羸
泰極於越於塗炭之上師無私焉保餘杭於金湯之
固政有經矢志獎王室績冠侯藩溢于旂常流在丹

素雖鍾繇刊五熟之釜竇憲勒燕然之山未足顯功
抑有異數是用錫其金板申以誓詞長河有似帶之
期泰華有如拳之日惟我念功之旨永將延祚子孫
使卿長襲寵榮克保富貴卿恕九死子孫三死或犯
常刑有司不得加責承我信誓往惟欽哉宜付史館
頒示天下

是月勅封胥山惠應侯為吳安王

景福二年始作羅城而江濤勢激板築不能就王因

禱之沙漲一十五里餘功乃成故有惠應之請前年
安仁義以游兵往復禱之一夕驚濤沙路盡毀至是
感其靈貺請而封之

九月湖州刺史李繼徽以州附淮南牙將沈攸拒之繼
徽遂奔是月乙未王親巡吳興收繼徽家屬凡二百餘
人而還湖州平王命海昌鎮將高彥為湖州制置使

李繼徽亦作彥徽父師悅乃徐州馬步院之小吏也
屬王仙芝作亂遂投行伍役以獻黃巢首級功遂授

是郡師悅能書長於斷讞州有十五都頭其下俱數千人師悅撫之盡得其所時朝廷命將代師悅召諸校議之咸曰但慮君侯厭小郡耳不爾則苟有代人斷不奉詔會進士顧雲旅遊于雲乃請雲草奏論之雲表略云觀龍綸而彷彿猶鳳篆而依稀因不復代矣師悅在任置舟楫樹倉廩以圖割據董昌僭偽師悅率兵食以應之至是繼徽復以攜貳而敗焉初繼徽將納淮人也沈攸以逆順之理論之其衆因誓曰

附李氏者居西附沈氏者居東而居東者十得其九
繼徽於是惶惑而遁矣

冬十月淮人以臺濠守姑蘇代朱黨也十一月己卯台
州刺史杜雄卒

雄台州楊梅鎮人也初與朱黨婁文俱為草寇婁文
以雄為副文害刺史羅虬遂侵

彭城

漢宏不利因降漢宏

署婁文知明州事以杜雄知台州後漢宏敗率其下
六百餘人奔雄雄使偏將方師立饗漢宏于驛亭其

黨皆醉遂執漢宏歸越董昌奏授雄為德化軍使至是而疾卒

戊午五年春正月帝在華州改元光化是月我師救蘇州

生擒淮將李近思斬首一千餘級又斬其將梁琮張顥等而楊行密復遣將李簡率兵五千餘衆屯於無錫我師復攻之獲其偏將陳益等而還餘皆走之是月王以越州指揮使駱團為台州制置使二月勅移鎮海軍于杭州為理所從王請也又授都押衙董名犯太祖諱上一字等恩

命有差秋七月勅授王檢校太師賜定亂安國功臣八月車駕還京九月婺州刺史王壇遣將攻東陽王命使諭之息民故也冬十月王遣顧全武率師克蘇州臺濛李德誠等皆宵遁其下秦裴因力屈而降蘇州平

初遣顧全武等攻蘇州淮將刺史臺濛等皆棄城宵遁獨秦裴守崑山不下全武攻之裴屢出戰復斬侮全武全武怒益兵引水灌城城壞乃出降王曰爾軍弱如此何敢久為旅拒裴曰裴義不負楊公今力屈

而降耳王善其言而全武亦請宥之王從其請

王以嘉興都將曹圭權蘇州制置使尋命為本州刺史
是月勅王兼兩浙安撫使加食邑一千戶實封一百戶
閏十月婺州王壇抗命王遣師伐之而衢州刺史陳岌
貳於我王復遣顧全武等討之十一月成及至自淮南
王亦以魏約等歸淮南以報之

已未光化二年春正月我師大敗陳岌黨于龍丘二月勅
遣高品周道安改王本縣石鏡鄉為廣義鄉臨水里為

勲貴里所居安衆營為衣錦營仍賜兩浙行軍司馬杜
稜以下一百二十人並號贊忠去偽功臣三月婺州王
壇求救于淮南夏四月勅陞杭州為大都督府是月淮
帥遣將康儒等來應東陽王命副指揮使方密羅聚等
濟師於婺州及蘭溪義烏等縣秋七月淮人有使入衢
州者為我師殺之仍獲陳友所送楊氏地圖州印以歸
申庚三年春正月淮將康儒徐從臯等復攻婺州王遣從
弟錄率師討之三月我師大敗賊徒于軒渚遂絕其糧

康儒等由清溪而遁夏五月勅遣中使王金峰賞詔封王為南康王加食邑一千戶實封一百戶王表陳讓秋八月勅授王行軍司馬杜稜檢校太子太保是月庚申龍鬬于浙江因過于郭郭壞廬舍或吸居人浮空而去數里方墜亦有死者九月王壇奔宣城

壇本孫儒隊將儒敗率其黨三千奔睦州陳晟晟頗疑之處於外城未幾壇將降黨與三河鎮將陳巖攻婺州婺州刺史蔣環奔會稽壇遂有其地至是而壇

奔宣城

是月辛卯王親巡婺州命浙西營田副使沈夏權婺州
刺史壬辰王至東陽而東陽鎮將王永伏誅

永東陽人也在鎮治城壁置鼓角粧樓舞榭薨棟相

接又來妖妄立十

十一作石

瑞亭將窺本郡及王壇攻之

王以前年婺民為安仁義所撓王故遣使諭之壇罷
兵將追永歸于府城而壇不從命故代之事平責永
以不敬故斬之以謝百姓

是月甲午王復巡衢州陳爰降王以爰為浙東安撫副
使命顧全武權知衢州事

爰兄儒本黃巢之黨尋降朝廷授以饒州光啓三年
率其部伍自饒廳事直指衙門而出人無預知者且
誡其下曰我自棄他郡州人無負我者有殺掠者斬
由是市不易肆既而徑趨衢州知州玄泰迎於郊儒
詰之曰玄宗御容安在泰泣曰使君不見容矣時信
安有玄宗銅容泰毀之故以是為責遂斬之而自據

焉凡在信安十年頗有惠愛每秋主司請納稼儒必至城南綠野亭觀其刈穫始使輸之又嘗見吏於倉所輒振衣以避糠粃儒怒而罰之其所為率皆類此南海節度使彭宗龜道由信安見其品裁乃撫之曰此賊有士人之風儒亦欣然而謝之及儒病瘕入省之因顧瘕曰汝非偵我耶今汝仁弱其如諸校何乃召列校豪强者十餘人入卧内皆斬之遂以郡付瘕王壇之叛瘕寔同其惡至是降而宥之

冬十月勅遣中使取王形圖于凌煙閣王命寫容以進

十一月庚寅中尉

彭城

李述

姓犯王諱

與王仲先樞密王彥範

等幽昭宗于問安宮立德王裕以為帝以昭宗為太上

皇勅遣使進王為東安王王不受命是月己酉葬皇考

太師于安國縣錦衣鄉

或云義成鄉

清風里

初太師薨因有淮師葬是以緩按羅氏後集太師誌

銘曰昔歲己卯今辰己酉十一月也今以長厯推之

十月二十五日乙酉葬太師未知孰是

辛酉天復元年春正月昭宗反正大赦改元出太子裕復

為德王而

彭城

李述等皆伏誅是月勅遣使供奉官吐突

令鐸來宣諭仍賜國信二月王親巡衣錦營大會故老
賓客山林樹木皆覆以錦幄表衣錦之榮也命指揮使
陳璋為衢州制置使夏四月丁丑王親巡東府五月勅
授王守侍中進封實王加食邑一千戶實封一百戶仍
陞王所居衣錦營為衣錦城封石鏡山為衣錦山大官
山為功臣山秋八月勅授邵州刺史王子文穆王禮部

尚書遙領邵州刺史九月王以衢州制置使陳璋為本
州刺史是月壬子皇妣秦國太夫人水丘氏薨冬十月
淮將李神福等寇衣錦城王命顧全武方密率師禦之
全武等為賊所執

楊行密遣李神福等率兵欲圖杭州全武列八寨以
拒之神福詭言還師其所獲杭俘走還者皆不追至
暮遣羸兵先行而伏兵青山全武不知其詭奮勇追
之伏兵大發遂被執王聞之驚曰喪我良將也既而

神福欲歸又恐為王所邀乃遣人守衛王祖考丘壠
又令全武通家信王遣使犒之神福受其犒賂而還
十一月駕狩于鳳翔王聞之悲泣乃遣使奔問帝嘉之
賜王御服夾襖子一副仍降御札于衣襟焉十二月淮
人以師老糧乏求成而還是月勅王起復雲麾將軍上
金吾衛大將軍員外置同正員

時王以衣錦城被寇命玄同先生閻丘方遠下元金
錄醮于龍瑞宮其夕大雪惟醮壇之上星斗燦然殿

宇無所沾洒又有鑑湖宿釣者聞車馬之聲甚衆復
有一黑虎蹲于宮門外醮罷乃去 鑑湖昔賀知章
所居者一名賀湖因犯僖宗廟諱今以唐秘書此湖
故名易之也

壬戌二年春正月帝在鳳翔三月朔日有蝕之是月癸丑

至乙卯三日浙右大雪盈丈雪氣如烟而味苦夏四月

淮人以顧全武方密歸我王亦以秦裴報之

裴即光化時蘇州降

將也是月制加王食邑一千戶實封一百戶五月勅封王

為越王又加食邑一千戶實封一百戶是月庚戌溫州刺史朱褒卒兄敖代之

褒永嘉人也兄誕始為本州通事官屬寇亂兄弟皆聚兵禦之以功遂攝司馬及副使胡燔卒乃自據焉褒處兄弟性頗強悖一日輒收兄誕印綬以州屬

彭漢城

宏漢宏署褒州事褒耳下有一赤點每怒發則點移至口怒解如故誕廳吏嘗忤褒褒將殺之其母力救對曰比求郡蓋欲殺此輩耳卒不聽漢宏之亂褒

率黨助之尋以同姓結援于梁太祖奏授本州刺史
充靜海軍使褒善屬詩文亦好禮士但動不量力故
不及世而家滅亡矣

秋七月王親巡衣錦城治溝洫八月丙戌將還府城親
饗將校武勇都指揮使徐綰即席將謀不利惶懼辭以
疾王惡之即日命綰率所部先還次日王發自衣錦城
徐綰率兵已及府城焚掠郭郭左武勇都指揮使許再
思以兵迎綰同叛將及內城王子傳瑛亦作元瑛與三城都

指揮使馬綽牙將陳為等發懸門以禦之王次龍泉有
馳來告叛者王遂疾行時北郭城門牙將潘長與徐綰
遇斬首二百餘級退營于龍興寺王微服至德勝門牙
將周肅遣偏將鍾審以舟迎王王遂沿江至內城東北
登城而入城中莫有知者北門直更卒憑鼓而寐王親
斬之衆皆驚悟隨命都監使吳璋三城指揮使馬綽守
北門內城指揮使王榮武安都指揮使杜建徽守南門
又命指揮使顧全武率兵衛屯東府全武上言曰東府

不足往當詣邳溝何者綰必召田頽頽來淮南即興師
矣宜早圖之杜建徽言曰楊氏嘗由王脫孫儒之難彼
丈夫者豈不能報王耶請以難告王從之命全武行全
武曰獨行事必不濟請擇諸公子王曰我欲以元璫聘
于楊氏汝當輔而行焉全武遂與同往湖州刺史高彥
遣其子渭來赴難渭趨靈隱山而至為賊伏兵所害命
渭所部營于城南

高彥之聞難也亟遣子渭行渭曰今日不利彥曰赴

雖之急何以吉辰耶遂促渭行渭不敢抗命遂率所部徑趨靈隱山而來至是果敗

九月徐綰果召田頔于宣城頔先遣客吏何饒來致意曰相公請大王東之越城虛府署以相待所貴者兵不血刃耳王復曰軍中叛亂何方無之爾相公不嘗為人長乎反助其逆須徑來何用肆言也既而頔至泊于北門以旗鼓自蔽王登城將與之語俾開旗頔不之答王注弩中其執旗者頔見王城中大鼓噪懼退還營遷壘

于西北隅

今清波門是也

乃使其黨據營以辱王亦注弩斃之

顏伺夜復攻西北隅梯撞畢集城中矢石如雨賊墜溝

洩者不可勝計顏遂拔營而退十一月顏復具舟楫將

渡江絕西陵王命副指揮使盛造朱郁大破之俄而楊

行密使至顏營王城中莫有知其意者王曰田顏悖而

無機倘得密意必明言其可否王乃使人往覘之顏迎

行密來使于半道紅

半道紅在北郊舊植桃花之所凡數里

並轡而行果

與言及罷兵之事覘者迴以其言聞皆如王所料既而

顏率徐綰許再思歸宣城王命致犒師錢一百億以送之顏慮為我師所逐遂請質而去

初王行至龍泉聞變召李咸占之曰大王霸業方永但分野小災耳請勿為慮不然大王當有疾王曰寧我有疾豈宜害百姓耶王又召葉簡筮之曰賊無如我何王曰淮人將同惡乎簡曰淮人不來宣城當濟賊李冬方敗然宣城亦當敗于明年今不足慮如期皆驗也後武勇都指揮使徐綰本孫儒之黨來降乾

寧中王以守禦功因脩心膂前年錦城之役不用命
王惡之及是使治溝洫遂叛

是月溫州裨將丁章遂刺史朱敖敖奔無諸章遂據是
郡

癸亥

三年春正月己巳帝還京師夏四月溫州丁章為木

工李彥斧殺之裨將張惠據溫州是月城婺州秋七月
睦州刺史陳詢貳于我仍率黨攻婺州蘭溪縣王遣指
揮方永珍等率師討平之九月宣城田頴安仁義俱叛

于淮而淮帥楊行密請師于我王命方永珍率師至京
口又命從弟鎰率兵次宛陵以應行密師又命指揮使
楊習代方永珍於睦州冬十月我師與淮人生擒安仁
義于潤州歸淮師而斬之田頔死於陣其母奉文穆王
歸焉

甲子四年春正月帝發長安三月勅遣衛尉卿許渾來宣
諭仍賜國信是月王子元瑋與所聘楊氏至自淮南夏
四月帝至洛陽大赦改元天祐勅遣給事中鄭祈刑部

員外郎楊永休

亦作永承

進封王為吳王加食邑二千戶實

封二百戶秋八月昭宗崩太子即位勅遣來宣告王素

服舉哀于軍門是月淮人檻送徐綰歸我王命剖心以

祭高渭冬十月朔日有食之是月癸酉大雪平地丈餘

乙丑天祐二年春正月制授文穆王等官爵是月淮將閻

睦等來援新安王命從弟鑑與指揮使顧全武等禦之

我師不利鑑等被執于賊三月廣帥

彭城

隱始有南海而

衢州制置使陳璋亦貳于我夏四月陳璋會睦州兵及

淮將陶雅等同攻東陽王命弟鏢帥師討之秋八月處
州刺史盧約弟佶冠永嘉張惠奔無諸王命方永珍濟
師于東陽會師討賊九月陳璋陷東陽執刺史沈夏送
于淮南

夏海鹽人也徐及為監鎮與高彥隸其中及亦八都
之一號海昌者也王副董庶人討城漢宏于越州
徐及遣夏與高彥率本部會我師王見之甚悅延入
卧內謂曰吾東討之師已衆渡江之後無勞爾輩但

徐及平素強梁終非我所蓄以我東討或為後患汝還本營為我殺之皆當以列郡牧汝然吾非誨人為逆但境土苦于干戈不仁者當盡除之用息生聚且汝等當識吾意夏等再拜聽命王厚遣之既回告及曰董公與錢公以兵討賊聞將軍遣所部見助喜動于色然以東北為慮設有狗鼠偷竊復勞後顧夏等寔託將軍以為後據及有軍師竊視夏等謂及曰二校至自錢塘皆有色文在其面將軍宜備之及不聽

夏遂與其下謀之一夕竊發及死其下遂分夏性亮
暴不即我歸乃以所得衆七千餘人聚於臨平山下
擇幼弱者盡殺之惟留三千餘人徑往嘉興劫吳公
約同入海為剽公約不從將殺之乃叩頭曰惟吾兄
之命遂與俱往未幾夏以公約庸懦因放其歸夏所
圖無成始復歸王王亦優容之累從征伐厯奏職官
領遥郡至任果以殺戮為事左右指令小不稱意即
加屠害王頗惡之夏一日復構私第于北郭制度雄

壯侔于公府今北市酒家樓俱夏之第也其長子有過輒手刃之王以其噬子滋不悅出為東陽刺史淮將陶雅以兵攻其郡王不急救遂為淮人所執尋遇害陳璋自稱衢婺二州刺史復分兵與淮將許野鶴等犯我暨陽王命楊習逐之

一本作廬

璋兵大敗習遂攻東陽冬

十月有獸入吳興一角而麟趾十一月王命建功臣堂于府門之西樹碑紀功仍列賓寮將校賜功臣名氏于碑陰凡五百人是月楊行密殂子渥嗣十二月睦州刺

史陳詢奔淮南

詢即晟之弟餘杭人也晟在郡十八載而卒子紹權嗣詢黜紹權而自立懼非王命頗不自安屬徐許之亂乃通田頔頔敗詢益懼及王命桐廬縣使府復徵軍賦遂不聽命而叛至是而奔

丙寅三年春正月淮將陶雅率其黨自睦州歸歙是月王親巡睦州時宣州觀察使王茂章為淮人所圖因奔于王王以為鎮東軍節度副使二月辛卯王至睦州陳瑋

退保衢州婺州平是月丁酉玄同先生閻立方遠卒

方遠其先齊人嬰之後也父閻不仕以文學節行稱
方遠幼辨慧學于廬州道士陳玄悟尋傳法錄于天
台主洞霄宮葉藏質方遠雅好儒學每披卷得之趨
必曰葛稚川陶隱居俱吾之師友也詮太平經為十
三篇景福庚戌歲始居餘杭大滌洞初入謁王談莊
老之義遂巡而罷退而歎曰彼英雄也是不宜與談
玄虛之道翌日入謁遂陳春秋因延之盡日由是王

厚加禮遇重建天柱宮俾以居之王奏請賜紫又勅
賜號玄同先生一日王于城南樓命方遠圖形前一
夕王夢方遠駕鶴至由是王益竒之江東羅隱每就
方遠授子書方遠必瞑目而授餘無他論門人夏隱
言謂方遠曰羅記室上令公客先生何不與之語方
遠曰隱才高性下吾非授書不欲及他事而隱亦盡
師弟之禮是日乃降聖節前一日王使人以香花至方
遠受訖乃入齋中作控鶴坐怡然而逝復有異香滿

室王以夏隱言繼其住持也

一日王命方永珍楊習等進攻衢州三月命浙西營田副使馬綽權睦州刺史夏四月朔日有蝕之洪帥南平王鍾傳卒子匡時嗣六月淮人陷洪州擄鍾氏而歸秋八月衢州陳璋導淮將周本呂師造等入其境為我師所逐遂奔淮南

璋本孫儒之黨尋降于王以從征董庶人功遂被任用天復初始赴本部王親餞于江干徐綰作亂越州

客軍張洪等疑懼乃與其黨三百餘人奔璋璋納之又屬丁章叛于永嘉而宣州田頔使其下戚滔將招之璋因假道而遣王聞之乃密使衢州羅城指揮使葉讓殺之事洩璋遂殺讓而叛初王命璋城衢州工畢以圖獻王王視西門樟樹謂左右曰此樹不入城陳璋當非我所畜也至是果驗


九月周本等率其黨歸信州王命方永珍為衢州制置使是月勅遣右散騎常侍王矩司勳郎中裴均授王吳

王冊禮冬十一月乙丑湖州刺史高彥卒子澧嗣

彥海鹽人也初與沈夏同受王密旨殺徐及及死以
首歸于王彥等前後從征悉有功效及湖州李彥徽
棄郡奔淮南王親巡吳興其將沈攸等皆以已功有
牧守之望王遂題詩一章於嬰蘭堂在湖州東南溪
次末云須將一片地付與有心人衆亦不測王將登
舟始言曰我將此郡付汝宜善撫之彥性淳厚居十
一載政治簡便累奏授職官遙領費州刺史尋至今

任將終有道場山僧如訥訥口能容拳垂手過膝是
乃異僧及入州城彥以師事之一日彥與之語訣別
未幾而卒

是月勅命王本道建三代師廟閏十二月王命弟鏐為
婺州制置使



吳越備史卷一

欽定四庫全書

史部
吳越脩史卷二

詳校官監察御史_臣查瑩

檢討_臣德生覆勘

總校官庶吉士_臣倉聖脉

校對官中書_臣李斯咏

謄錄監生_臣譚世緯

欽定四庫全書

吳越脩史卷一

宋 錢儼 撰

武肅王

丁卯四年春三月勅升衣錦城為安國衣錦軍王命文穆
王伐溫州夏四月戊午克溫州斬盧侏而還王命都監
使吳璋為溫州制置使文穆王復討處州是月梁太祖
受唐禪大赦改元開平奉唐帝為濟陰王勅遣上金吾
衛將軍石彥辭刑部郎中薛昭序來宣諭

初梁室受禪有勸王拒之王笑曰古人有言屈身於陛下是其略也吾豈失為孫仲謀耶遂受之

五月處州盧約納欵于我王以為浙江安撫副使命指揮使俞浩為處州制置使是月勅遣金吾衛大將軍安崇隱進封王為吳越王增食邑二千戶實封三百戶仍賜號啓聖匡運同德功臣

初節度判官羅隱勸王舉兵討梁曰縱無成功猶可退保杭越自為東帝奈何交臂事賊王以隱不過于

唐有怨心其言雖不能用心甚義之

六月勅遣中使來宣諭秋七月勅賜王管內刺史並授
官爵仍賜母妻封邑八月勅授王兼淮南節度揚州大
都督淮南四面招討制置使九月詔封衣錦軍神祠號
崇福侯是月蜀帥王建稱帝國號武成冬十月勅授文
穆王金紫光祿大夫十二月淮人攻信州刺史危仔昌
來求救于我王遣師援之

戊辰開平二年春正月勅改臨安縣為安國縣廣義鄉為

衣錦鄉夏五月淮南都將張顥殺其帥楊渥而自立為
畱後逾旬日大將徐溫復殺顥立楊渥弟隆演為帥六
月制授王檢校太師守中書令增食邑一千戶實封一
百戶秋八月勅改杭州唐山縣為吳昌縣台州唐興縣
為天台縣是月又勅升杭越等州為大都督府王送宣
州王茂章入京師茂章更名景仁避廟諱也九月制授鎮東軍節度
副使成及為保大軍節度使同平章事副使餘如故未
幾淮南人困圍我姑蘇王命從弟鋸率兵討之

已三年春正月梁主遷都洛陽祀南郊大赦二月朔日
有蝕之勅選王子兩浙副使傅瑛為駙馬都尉夏四月
制授王守太保增食邑二千戶實封二百戶是月王命
弟鏐江海遊奕都虞候何逢司馬福等率師圍姑蘇內
外夾攻生擒淮將何朗閭丘直等凡三千餘人獲兵甲
生口三十萬戰船二百餘艘陳璋周本呂師造等夜遁
五月甲寅王親巡姑蘇是月丁巳明州刺史黃晟卒

晟明州鄞縣人也初應募於望海鎮鎮中立表以選

其魁梧者晟以矮陋不中選乃隸鎮都虞侯林膺而
晟性强幹膺甚愛之後潛還本鄉募衆據平嘉埭時
權知州事楊僕名署為平嘉浦將有衆千餘人初城
漢宏嘗以台州賊婁文知明州事文為楊僕所敗其
黨杜宗自寧海鎮率鄉民據奉化晟自平嘉埭以所
部兵擊之執杜宗等不殺盡驅之使還台州獲其粟
帛悉屬於本道遂為奉化鎮將伙飛都知兵馬使及
餘姚鎮將相嘉侵越州董庶人禦之不利而刺史鍾

李文乃遣晟領兵攻相嘉擒殺之董庶人奏授晟左散騎常侍充浙東道東西副指揮使鍾季文卒遂有本郡晟頗尚禮士辟前進士陳鼎羊紹素以為門賓江東儒學多依之悉加優待仍築其居號曰措大營及董庶人僭偽晟亦移書諭之及王師舉晟亦率衆應之在任十有八年遺疏不請其子為嗣凡府庫所蓄必題曰送使其忠順如此

辛酉王自姑蘇復如東府辛巳復巡明州因城定海鎮

命子元球為明州制置使信州危仔昌為其下應淮人而叛遂奔于我王以為淮南節度副使六月壬寅王發明州勅遣刑部尚書姚洎禮部員外郎羅衮授王吳越王冊禮戍申至自東府

王之巡句章也行次餘姚丈亭鎮舟湊巨石不能進既而大雨震電有二龍負王舡之下鎮遏使翁元軻拽舟而進二龍自舡而升焉此其異常也

秋閏八月制授王守太尉加實封二百戶

制曰集非常之事必有挺非常之才建第一之功必有居第一之位朕膺圖受命負宸開階未嘗以真太尉之官輕於擬議大司馬之職易於簡求盖由其爵尊任重不有英佐孰當異恩啓聖匡運同德功臣淮南鎮海鎮東等軍節度使淮南浙江東西等道管内觀察處置充淮南四面都統營田安撫兼兩浙鹽鐵制置發運等使開府儀同三司檢校太師兼中書令杭越等州大都督府長史上柱國吳越王食邑一萬

五千戶實封一千戶錢某海岳騰英星雲誕秀契君
臣咸一之德有文武兼脩之才宣慈惠和忠正廉毅
敦詩說禮樹百行於藩籬去暴除奸敵萬人於帷幄
弼于興運明乃嘉謨頃屬淮夷不賓王化自爾益封
吳會兼鎮廣陵追擒每盡於隻輪覆溺連收其巨艦
復聞奸宄屢復巡討謂天蓋高若永可恃爾又橫戈
憤悻獨力支梧妙運神機大殲戎醜玄雲陣起雄風
驅下瀨之師白露圍開沴氣散常州之化再安生聚

重復土疆薛公之三刺咸明漢主之一奇斯在況早
攀鱗翼備見肺腸同德同心二紀密叅於締構惟忠
惟孝四方咸則於儀刑苟非劇恩何以加賞是用鏤
於彝鼎冊以輅車擬呂望之尊崇正列侯之貴重仍
加真食復寵兼官式是獎酬且旌忠烈於戲進以正
大易所以經邦慎厥終始書用之居位勉思遵守克
荷寵靈服予訓辭錫爾繁祉可守太尉加實封二百
戶餘並如故

是月勅置蘇州吳江縣明州靜安縣

今定海縣是也

從王請也

冬十月湖州刺史高濃貳于我遣其黨焚燒義和臨平

等鎮王命弟鏢帥師討之十一月乙酉發運使羅隱卒

隱字昭諫新登縣人也祖知微福唐縣令父修古應

開元禮科隱本名橫凡十上不中第遂更名初從事湖

南歷淮潤皆不得意乃歸新登及來謁王懼不見納

遂以所為夏口詩標於卷末云一箇禰衡容不得思

量黃祖漫英雄之句王覽之大笑因加殊遇復命簡

書辟之曰仲宣遠託劉荊州都緣亂世夫子辟為魯
司寇只為故鄉隱曰是不可去矣王初授鎮海節度
時命沈崧草謝表盛言浙西繁富成以示隱隱曰今
浙西兵火之餘日不暇給今朝廷執政方切於賄賂
此表入奏執政豈無意於要求耶乃請更之其略曰
天寒而麋鹿常遊日暮而牛羊不下朝廷見之曰此
羅隱辭也及為賀昭宗更名表曰上則虞舜之全文
右則姬昌之半字當時京師稱為第一隱性不喜軍

旅唯與丞相杜建徽善王初城西府命賓寮巡覽顧
謂左右曰百步一敵樓足以言金湯之固隱徐曰敵
樓不若內向及徐許之亂人皆以為先見一日隱寢
疾王親臨撫問因題其壁云黃河信有澄清日後代
應難繼此才隱起而續末句云門外旌旗屯虎豹壁
間章句動風雷隱由是以紅紗罩覆其上其後果無
文嗣隱累官錢塘縣令尋授鎮海軍掌書記節度判
官鹽鐵發運副使授著作佐郎司勳郎中歷遷諫議

大夫給事中賜金紫卒年七十七歲所著江南甲乙集淮海寓言及讒書後集並行於世初新登罷江常有二氣亘于江上晝夜不滅及隱洎丞相杜建徽生而二氣不復見識者以為文武秀氣焉

庚午四年春二月湖州高澧導淮將李簡陳璋等入其境都將盛師友沈行瑜閉城不納王遣子元璩濟師禦之淮人挾澧而遁

澧高彥第三子也初彥夢一羽人持劍入卧内彥驚

問其故羽人答曰來為君之子報數千冤耳其母自是而孕不足月而生澧年十三四性即暴虐及嗣父位恣行殺戮將吏侵晨入衙必與妻子訣別而入每登消暑樓眺望則州城東西水陸行人亦皆絕跡澧夜叉精也嘗詣太常博士丘光庭不知因迴顧見一青面鬼遂大呼俄而見澧密言曰博士慎勿言是驗之也又召鄉丁為衙軍號儕要都皆文其面衣青衫白袴以緋抹額凡所指令必躬身仰首如夜叉之狀

刀鎗弓矢常居左右又令州人皆黥面約三日當畢
過限則誅澧則以畫面而傳之乾粉州人既黥澧乃
洗去晚年將敗召郡吏議曰我欲盡殺百姓可乎吏
對曰百姓租賦所出殺之無可取供給願求他可殺
者時親紀三丁軍三千餘人會有言其怨嗟者集於
開元寺給曰將饗汝因閉三門之半而納之入者旋
殺迨半在外者方覺因奔逸縱火為亂澧聞盛怒閉
城大索戮之無遺王以其克虐滋甚將伐之由是而

叛先是道場山僧如訥以高彥將死與其訣別退而謂其衆曰高公將殂我亦當逝何者盖有白面夜叉治此政矣爾輩亦宜避之俄而澧代其父白面者盖澧未黥面耳澧至淮南屢取倡姬入私室殺而食之時王將戮之至是叛遂為淮人所害

三月癸巳王巡吳興命弟鏐為刺史癸卯至自吳興夏五月奏改西府富陽縣為富春縣東府暨陽縣處州松陽縣為長松縣秋七月詔原前監軍周廷誥已下二十

五人

時有詔誅之王以其自前朝將亂求出避禍並非

彭城

季述之黨請以原之遂有是命

八月始築捍海塘王因江濤衝激命强弩以射濤頭遂定其基復建候潮通江等城門

初定其基而江濤晝夜衝激沙岸板築不能就王命强弩五百以射濤頭又親築胥山祠仍為詩一章函鑰置于海門其略曰為報龍神并水府錢塘借取築

錢城既而潮頭遂趨西陵王乃命運巨石盛以竹籠
植巨材捍之城基始定其重濠累塹通衢廣陌亦由
是而成焉

冬十月戊寅王親巡衣錦軍製還鄉歌

歌曰三節還鄉兮掛錦衣碧天朗朗兮愛日暉功臣
道上兮列旌旗父老遠來兮相追隨家山鄉眷兮會
時稀今朝設宴兮觥散飛斗牛無字兮民無欺吳越
一王兮駟馬歸

丙戌至自衣錦城命湖州都將盛師友權婺州刺史命
斬湖州巡校將沈行思

一名行瑜初高澧將奔而師友行思同有閉城之功
王巡吳興乃命師友從行而其時行思尚羈于害行
思亦頗有牧守之望乃謂其同職陳環曰盛君來豈
不珮印綬而歸耶不然我後安處子為我裁之時環
已得密旨俾遣行思歸國乃給之曰二人之功本無
優劣然王情尚未可測宜亟詣府城面較功績以決

其可否行思來覲王亦優待之環以送行思家屬至
行思始悟其事深銜環遂懷怨望王將及國城行思
與陳環俱候于北郊行思自取巨槌擊殺環奔王舟
以陳其前功復言師友與環毀間之狀時師友方從
亟引之以相證行思輒奪威鎗將刺師友左右遂擒
之王曰吾早以汝強梁故不欲任始念汝閉城之功
將牧之他郡而今所為若此疇能容之乃命斬于龍
丘山許其家屬收塋而師友遂有是命

辛未五年春正月丙戌日有蝕之夏四月制命王守尚書

令兼淮南宣歙等道四面行營都統增食邑二千戶實

封一百戶勅遣刑部侍郎李光嗣建王生祠于衣錦軍

勅翰林學士李琪為碑文

時從僚史將校衆所請也

五月朔梁改元

乾化是月築松江南北二城鑠柵畢備設險故也秋七

月勅命淮南兩浙幕府將吏五百人並賜贊政安國功

臣九月梁主如相州冬十月湖州刺史王弟鏐殺防戍

指揮使潘良懼譴遂奔淮南十一月梁主還京是冬廣

帥彭城隱殂弟巖嗣

壬申乾化二年夏閏五月朔日有蝕之梁主如洛六月梁主遇弒郢王友珪僭位秋七月遣刑部尚書李皎尊王為尚父八月己丑城西陵

癸酉三年春正月友珪改元鳳歷肆赦二月均王友貞舉兵誅友珪遂即位於汴京更名頊復稱乾化勅遣供奉官楊彥賓來宣諭三月勅授王尚父冊禮夏四月制增王食邑三千戶實封二百戶准將李濤率兵二萬自千

秋嶺寇我衣錦城王命文穆王討之生擒李濤等八千餘人王又命子元臻帥水師攻東州又獲賊將李師愈姚延環等三千餘人而還五月淮將復寇衣錦軍復命文穆王討之六月師克廣德縣獲花虔渦信及吏卒七千餘人而還是月辛卯彰義軍節度使檢校太尉兼侍中成及卒

及字弘濟錢塘縣人也祖克評嘉王府長史父貞國子博士及性淳厚為鄉里所重咸通中戍戎間捍山

賊逐齊寇聲名遂振及八都浸盛復分十三都以富
春鎮為靜江都將屬城彭城漢宏作亂與王同事攻討
漢宏平北關鎮將彭城孟安謀亂即席奮劍將犯王
及舉胡床制之偏將盛造因執孟安就戮以功奏遷
散騎常侍復為靖江鎮光啓中潤州薛朗叛王命及
討之時常州刺史丁從寔具牛酒以犒我師仍遺美
女於諸將及取而斬之餘悉不納因克之尋平潤州
王奏及授兵部尚書充常州防禦使潤州阮結卒命

及代之累遷檢校司空尋為蘇州刺史乾寧時淮人
圍姑蘇常熟鎮將陸郢巡檢郭用與其黨趙邯以城
應寇邯手刃其母妻子以盟城陷及以禮見楊行密
行密閱及府庫私室皆藥物圖書而已由是重之至
淮南辟為行軍司馬及拒之曰及以百口託于錢塘
不幸城陷於叛以至於此豈宜復以本道符竹援富
貴於隣境不惟丞相不可百口其謂我何乃引珮刀
自刺行密遽止之因厚禮而歸焉累署鎮海軍節度

副使奏授司徒至太傅天復中王巡衣錦軍命武勇
都將士以治溝洫軍中多怨言及慮有變亟請罷役
王不聽俄而亂作及護王駕迴至北郭王微服將入
城及乃代乘王車行與賊鬪王遂得入王性嚴急每
有所檢發必亟加斬決或及至王雖盛怒必為之解
其寵遇皆此類也累奏授贊正安國功臣保大彰義
等軍節度使開府儀同三司檢校太尉贈太師兼侍
中卒年六十七

冬十月勅加文穆王開國爵邑是月乙酉大同軍節度使駙馬都尉王子元瑛卒

瑛王子也母吳越國莊穆夫人吳氏原名傳錯後更名烏性英敏頗尚儒學聚書千卷善草隸好施時徐綰之叛城中有錦工二百餘人皆潤人也瑛慮其為變乃命曰王令百工悉免今日工作遂放出城而發懸門王入城聞其事頗嘉之尋為兩浙副大使梁太祖拜為駙馬都尉累授大同軍節度使同平章事公

主未及降而薨年三十六勅贈太師

十二月王命子傳璚權蘇州刺史

甲戌四年夏六月制授文穆王開國侯食邑秋七月廣帥

城彭巖遣供軍巡官陳用拙奉禮幣請兄事于王王納之

九月命文穆王率兵攻常州無錫縣獲將卒五百餘人而還

乙亥貞明元年春正月朔改元大赦是月勅授文穆王以

下官爵有差甲午王親巡衣錦軍二月勅遣給事中韋

彖金部郎中李發選王子傳璊為駙馬都尉閏二月己亥王至自衣錦軍

丙子二年春正月勅授浙東營田副使常州刺史杜建徽

為涇源節度使

王命建徽護送傳璊進京師尚壽春公主遂授此任

秋七月勅授

王為諸道兵馬元帥冬十二月王命惠州防禦使弟鐸率官吏僧衆詣明州鄞縣阿育王寺迎釋迦舍利塔歸於府城仍建浮圖于城南以致之

丁丑三年春三月勅授王子贊正安國功臣鎮海軍北面

水陸都指揮使兼北面行營招討金紫光祿大夫檢校

太保守湖州

湖州一作蘇州

刺史大彭郡侯食邑一千戶傳璫

贊正安國功臣鎮海軍節度副使土客諸軍都指揮使

金紫光祿大夫檢校太保大彭郡侯食邑一千戶傳球

贊正安國功臣鎮東軍東面水陸安撫都指揮使光祿

大夫檢校太保守溫州刺史大彭縣男食邑三百戶傳

遂贊正安國功臣鎮東軍西面安撫都指揮使光祿大

夫檢校太保守睦州刺史大彭縣男食邑三百戶元懿

贊正安國功臣鎮東軍親從都指揮使兼土客諸軍安撫副指揮使銀青光祿大夫檢校司徒守賓州刺史傳璿贊正安國功臣鎮海軍上右廳都指揮使兼土客諸軍安撫副指揮使金紫光祿大夫檢校司徒前明州刺史元球贊正安國功臣衣錦軍防遏都指揮使金紫光祿大夫檢校司空守義州刺史傳琿贊正安國功臣鎮海軍衙內先鋒指揮使金紫光祿大夫檢校司空守峰州刺史傳珣贊正安國功臣鎮海軍節度上押衙充安

國衣錦軍親從副指揮使兼兩直都虞侯金紫光祿大夫檢校尚書右僕射守巒州刺史傳琰贊正安國功臣鎮海軍節度右押衙充上直都知兵馬使銀青光祿大夫檢校尚書左僕射傳璠等十一人各授官秩階爵及遙郡有差夏四月詔諸道兵馬元帥府開幕除史一同天策上將軍府故事是月復以峰州刺史傳珣守檢校太保餘如故冬十月勅遣吏部尚書李燕中書舍人韋說授王天下兵馬都元帥是月黃龍見於卞山之金井

洞命立瑞應宮

一作祥應宮

戊寅四年春三月朔四星聚斗王置元帥府僚等官勅授

兩浙行軍司馬秦州節度使平章事馬綽守檢校太尉

同平章事行軍餘如故夏四月廣帥

彭城

嚴僭稱大漢皇

帝年號大有

進士王詡之在南海著昭陽賦一篇序云皇章基構

乾坤十有八歲矣甲子春始作茲殿計其甲子則巖

本年僭號今據皮氏舊錄而書之云前年丁丑僭號

其誤明矣

六月西川王建殂子衍嗣改年乾德是月王命子元球
權衢州刺史命鮑君福等率兵攻信州斬淮將李師造
生擒偏將馮一一作敏等一千餘人刺史周本僅以身免

秋八月制授涇源節度使杜建徽守檢校太傅同平章
事冬十二月淮人圍虔州將絕我貢路刺史盧光稠來
告王命徵兵援之未及境而虔州拔矣航海入貢自此
始也

巳卯五年春三月勅文穆王伐淮南夏四月淮帥楊渭

又名

隆演僭稱大吳皇帝年號武義文穆王率師與淮人戰於

狼山之江大敗淮人斬賊將百勝軍使彭彥章生獲士

卒七千餘人制以湖州刺史大彭縣開國子王子傳璟

為宣州寧國軍節度使同平章事秋七月我師復攻毗

陵因戰於無錫指揮使何逢吳建死之遂班師八月淮

人以狼山之敗遣偽客省使歐陽汀來請通好

王納之
息民故

也自是休兵民樂業二十餘年九月朝廷以南海僭號詔我師伐之

制曰朕聞綱紀亂常前王無赦懲惡勸善有國不私
苟罪惡以顯彰在刑名而何逭其有身當問關寄受
國恩敢行不軌之心具驗速辜之跡頒行典憲仍命
誥誡清海建武等軍節度使嶺南東西道觀察處置
供軍糧料市舟等使開府儀同三司檢校太保兼中
書令持節都督廣州刺史上柱國南平王食邑五千
戶彭城巖頃因乃父發跡本藩尋賴其兄致身賓席受
先朝之拔擢極上將之寵權念其尊獎之誠許維藩

宣之任嚴乃自行軍之職繼膺推轂之恩秩進三師
位同四輔自朕獲承大寶累進崇資一門無比其超
榮百世豈儔其寵耀而敢飛章不紀希寵無厭始求
抑絕四隣後請封王南越貪饕斯甚踰僭孰偕朕每含
容再申優渥授之東鎮加以南平比罔思知足益恣
虎狂妄稱漢室遺宗欲繼尉佗醜跡結連淮海阻塞
梯航徒惑遠方僭稱大號在人情而共棄豈天道以
能容宜命討除用清逆亂爾天下兵馬都元帥錢志

扶廟社任總兵師每興憤激之辭願舉誅夷之令是
用俾予元老平彼叛臣先行奪爵之文爰舉摧亮之
典其彭城巖在身官爵並宜削奪仍委指揮征討於戲
將相重任子孫殊榮不能常守于藩修而乃自干於
國典指克殘而必取念染污以將新非我無始終之
恩蓋爾有滿盈之罪凡百珍重悲體朕懷

王雖受命而山川隔越地方擾攘尋以事寢冬十一月
丁亥吳越國正德夫人吳氏薨

夫人臨安縣人也父仲忻浙西觀察判官累贈吏部尚書初王議婚吳氏以王豁達大度不事產業將不許而吳世父有知人之鑒固促成之及歸室閨門整肅孝敬如禮王性嚴急常怡顏以諫之撫愛諸子無分彼此之親累封燕晉二國至吳越國正德夫人夫人將遊奉國寺中王乃命帛百疋以脩散施夫人曰妾脩嘗機杼之勞遽以遊賞費之非念人之道遂不受而罷其仁慈節儉如此薨年六十二歲謚曰莊穆

有子十三人

庚辰六年春二月勅授宣州節度使同平章事王子傳璟

以下並起復雲麾將軍上右金吾衛大將軍員外置同
正員餘並如故三月王命元帥府判官皮光業使于邗
溝夏五月淮南楊渭殂弟漣嗣偽謚渭為宣皇帝秋七
月王以子睦州刺史傳懿為婺州刺史

辛巳七年春三月王從弟鑑至自淮南王亦歸李濤以報
之

鎰以天祐二年睦州之役為賊所執李濤以乾化三年來寇我衣錦獲之至是各歸焉

夏五月朔梁主祀郊改元龍德六月朔日有蝕之秋七月潭州楚王馬殷遣掌書記李峴馬臣送女歸于都知兵馬使檢校尚書左僕射王子傳璠冬十月制授文穆王檢校太傅同中書門下平章事充清海軍節度使自是賜王書詔不名

壬午龍德二年春正月勅授文穆王以下並起復加爵邑

有差秋七月王建天下元帥府于興國門之右八月兩浙行軍司馬秦州雄武軍節度使同平章事馬綽卒

綽餘杭縣人也性氣淳直與王同事董昌昌嘗使王閱部伍亡其名籍王因歷唱之存亡健悴者無所遺失綽密謂王曰老氏忌前駭此強記必相惡乃以白籍紙數幅授王若代軍籍者由是頗德之王因以從妹歸綽綽尋隨董氏於越及董僭號綽棄家先奔于王乃奏授諸城都指揮使徐綰之亂綽有發懸門之

功王尋命文穆王納綽女是為恭穆夫人綽累職鎮
東軍節度副使兩浙行軍司馬睦州刺史王奏授秦
州雄武軍節度使同平章事終年七十一

是冬一日王晝寢夢青衣人捧簿書于前告曰大王明
年錢塘官滿及寤頗惡之

明年天子乃命王封冊中外皆如列國之儀其兆明
矣

癸未三年春二月勅遣兵部侍郎崔曄一作協刑部員外郎

夏侯昭冊封王為吳越國王受封冊建國之儀一如典禮先一日雨雪王命李咸將卜他日咸曰大王雙受封冊惟天所相雨雪必霽則可以卜社稷之延永王從之即夕星斗明麗翌日遂成其禮

王建国儀衛名稱多如天子之制惟不改元置百官丞相客省等使

四月唐莊宗即位于魏州大赦改元同光是月梁亡

梁哀

入洛陽因都焉并溝入賀京師上書稱大吳國王乾寧中有耕

者得傳國璽以獻于王王謂非人臣家所宜畜至是獻
焉五月勅遣宣諭使通事舍人吳韜走馬自淮甸至賜
王名馬玉帶香藥等先是梁室詔勅不名至是依前不
名亦曰吳越國王焉冬十月朔日有蝕之十二月唐主
遷都洛陽

甲申同光二年春二月唐主南郊大赦二月癸卯金吾衛
大將軍置同正員檢校司空明州刺史王子傳曜卒

曜王第八子也母濟南郡夫人童氏曜性仁厚明敏

好學治郡自得政體累授鎮東軍親巡都指揮土客
諸軍安撫使光祿大夫賓州刺史奏授金吾大將軍
員外置同正員檢校司空改明州刺史年三十惜哉
秋七月西川王衍稱大蜀皇帝致書于京師八月王遣
使入貢冬十月制授王依前天下兵馬都元帥尚父尚
書令吳越國王授文穆王檢校太師兼中書令充兩浙
節度使觀察留後十一月升蘇州為中吳軍制授鎮東
軍節度檢校太保兼中書令大彭郡侯王子傳瑯

一作元瑯

充中吳軍節度使

乙酉三年春二月南海入賀京師上書自稱大漢國王夏四月朔日有蝕之秋八月勅遣正議大夫守尚書上柱國贊皇郡開國男賜紫金魚袋李德休等持節備禮賜黃金印玉冊及沿身禮物衣冠劍珮等

冊曰維同光三年歲次乙酉八月辛酉朔二十七日丁亥皇帝若曰王者惠濟黎元輯寧方夏重名器任股肱忠而能力則禮崇賞不失勞則人勸所以啓周

公之土宇列漢祖之膏腴者錄彼茂勲真諸異數登
進賢哲焜燿事功也天下兵馬都元帥尚父守尚書
令吳越國王錢潮海靈源承天峻岳以英風彰德望
以勇氣贊忠貞往因義舉之徒盛推韜略遂著襲封
之績高步藩維挺魚鯢鳥鳳之姿擁岼虎水龍之衆
居方面任將五十年宣導休聲攘除兇醜推堅奮銳
鄙許東固圉之謀阜俗頒條廣冀北安居之頌環塹
浙江之要雲滋星紀之墟說禮敦詩位崇元帥前茅

後勁名重中權守畫一之規奉在三之節信立靡移
於風雨義行曷倦於津塗効琛則那顧險難薦幣則
常歸宰用振英謨而端嚴弼鍾懿號而異列藩可謂
職貢不乏梯航時至翼戴天子加之以恭也載念尊
獎爰示徽章今遣正議大夫守尚書吏部侍郎上柱
國贊皇縣開國男食邑三百戶賜紫金魚袋李德休
使副朝議郎守起居郎充史館修撰賜緋魚袋聶璵
持節備禮胙土苴茅冊爾為吳越國王於戲地奄數

圻賦過千乘墨守闔閭之境軌圍勾踐之封子弟量
才序進多分於榮戟土疆漸海方輸豈限於魚鹽貴
盛富強雖古之封建諸侯禮優夾輔不加於此慎厥
始終無以位期驕無以欲敗度欽承賜履協予一人
汝嘉

時唐主將議恩命於王顧羣臣曰朕從黉堂即聞尚父
之名宜以優禮尊之命脩冊禮有司乃脩竹冊銅印唐
主曰尚父元老不當待以人臣況已封建乎乃賜玉冊

金冊仍以紅袍御服一副賜焉九月王師大舉伐蜀冬十二月蜀僞主王衍降是月制授土客諸軍都指揮檢校太保兼鎮海軍節度副使王子元球守檢校太尉兼侍中充靜海軍節度使是月閩王王審知殂子延翰嗣自稱閩國主

丙戌四年夏四月戊寅王不康如衣錦軍命文穆王監國是月莊宗崩明宗即位大赦改元天成秋七月庚寅王至自衣錦軍八月朔日有蝕之九月制加文穆王食邑

一千戶實封一百戶又授中吳軍節度使王子元璫開
府儀同三司加食邑五百戶冬十二月制授靜海軍節
度使王子元球開府儀同三司食邑五百戶是月建州
刺史王延稟殺其弟延翰一名翰而立泉州刺史延均於
福州

延稟乃延均之庶兄也同起兵攻殺延翰延稟乃立
延均於福州而延稟歸建州矣

是歲大水蘇州尤甚水中生米大如豆民取食之

丁亥 天成二年春正月唐主更名亶夏六月楚武穆王馬殷建國秋八月朔日有蝕之冬十月唐主如汴是月淮南偽丞相東海徐溫卒子知誥嗣十一月吳王楊溥稱帝

戊子 三年春二月朔日有蝕之勅遣監門衛上將軍烏昭遇賜王湯藥國信等閣門通事李韞授文穆王鎮東兩軍節度使夏六月以來大旱有蝗蔽日而飛晝為之黑庭戶衣帳悉充塞之王親祀於都會堂是夕大風蝗墮

浙江而死

都會堂即白太傅居易之虛白堂基也王重建之號
八會亭江東羅隱為之記以王平吳定越講武計議
凡八會於此故名之後更名都會堂也

秋七月己巳忠獻王生

己丑四年春二月制授文穆王杭越等州大都督府長史
增食邑實封中吳軍節度使王子元璫增食邑五百戶
實封一百戶靜海軍節度使王子元球兼中書令餘並

如故楚州升為順化軍以明州刺史王子元珣為順化
軍節度使秋七月台州大水請軍儲三十萬斛八月已
酉今大元帥吳越國王王孫弘俶生是月明州餘姚縣
修舜井獲古佛舍利數十粒兼有珠玉奇玩王命內衙
指揮使徐仁綬近侍閭丘稔往迎之因建浮圖于城北
一如城南之制九月因樞密使安重誨兄弟用事于朝
嘗要求不克乃矯制以王為太師致仕仍賜烏昭遇自
盡

先是烏昭遇之來使也有供奉官韓玟承王子元球
恩命至玟性亮愎因恃酒凌昭遇由是有隙王以其
辱君命止以常禮遣之玟還京師遂構昭遇於樞密
重誨重誨以昭遇失使臣之體而亦嫌王以要求不
克誣王不禮君命遂同讒構命王致仕賜昭遇以自
盡也

王命文穆王奏雪其事奏不得通乃以絹書上之天子
始得聞焉出安重誨為河東節度使是歲所在地震居

人有壞廬舍者

庚寅五年春二月唐主南郊大赦改元長興元年夏五月制授文穆王以下食邑實封六月朔日有蝕之冬十一月楚王馬殷殂子希聲嗣

辛卯長興二年春二月勅遣監門衛上將軍張錢兵部郎中盧重賜王國信湯藥起王致仕復元帥尚書令國王如故依前不名仍示安重誨矯誣之罪

勅略曰天下兵馬都元帥尚父尚書令吳越國王錢

久列王公恒輸愛戴朕方禮加元老恩遇遠方安重
誨掇緝瑕疵遽行阻絕使錢元瓘拜闕上章傾懷請
罪言皆激切事且憑虛盡由爾介蠆之心有誤我含容
之德情不可恕罪不可逭宜出為河中節度今已誅
之以雪其寃故告

秋七月有象入信安境王命兵士取之圈而育焉八月
建州王延稟子繼昇繼倫奔於我蓋其父為延均之所
害也

初審知薨延翰嗣位以延稟為建州延均為泉州延均不悅而延稟亦憾於延翰於是泉建同啓兵攻福州殺延翰遂立延均於福州延稟歸建州將行謂延均曰善紹先人基業勿煩我老兄再至延均聞之含憾至是將圖延稟乃詐言已死使軍吏迎取延稟乃囚其子繼雄仍執延稟入城延均曰果煩老兄再至矣延稟瞪眦之而就戮其繼昇繼倫自是聞難而奔於王焉

冬十一月朔日有蝕之

壬辰三年春二月勅遣吏部侍郎盧詹刑部郎中楊薰賜王國信湯藥等三月己酉夜大雪庚戌王薨于正寢年八十一在位四十一年朝廷聞訃廢朝七日哀悼不已

詔曰天下兵馬大元帥尚父尚書令吳越國王錢本朝元老當代勲賢位已極於人臣名素高於簡冊贈典既無其官爵易名宜示其優崇宜令所司定謚曰武肅詔工部侍郎楊凝式為碑文

夏四月庚午奉靈輜殯於衣錦軍應順元年甲午春正

月壬午勅葬王於安國縣衣錦鄉

即錦北鄉

茅山之原

即今臨安

縣也

王始在軍中未嘗自安每欲暫憩必先整衣甲脩盥

漱而後寢焉又以員木小枕綴鈴睡熟則歌由是而寤

名曰警枕又置粉盤于卧内有所記則書之及撫鎮二

國殆及四紀勤勞恭儉始終一致每夕必列侍女各主

一更戒之曰外有報事當振鈴聲以為警省凡有聞報

即時而遣又常以彈丸於牆樓之外以警宿直者使其

不寐以應其事又嘗微行夜叩北城門吏不肯啓闕曰
大王來我亦不啓王乃自便門而入明日召吏厚賜之
稍暇則命諸子孫諷誦詩賦或以所製詩什賜于丞相
將吏以下由是往往達旦天復中近侍李詠因監契丹
驛中有判官謂李詠曰武肅王常夜不睡詠詰其所知
答曰嘗聞五臺王子太師言浙中不睡龍今已歸矣訪
其所聞乃壬辰之後也王少時倜儻有大度志氣雄傑
機謀沉遠善用長稍大弩又能書寫甚得體要有知人

之鑒及通圖緯之學每處衆中而形神有餘純孝之道
稟於天性每春秋薦享必嗚咽流涕嘗曰今日貴盛皆
由積善所致但恨祖母不能見耳嘗遊後庭層樓皇妣
春秋高不能上王親負而登焉天祐以後中原多事西
川王氏稱蜀邛溝楊氏稱吳南海彭城氏稱漢長漢王
氏稱閩皆竊大號或通姻戚或達聘好皆以龍衣玉冊
洎書疏等勸王自大王嘗笑曰此兒輩自坐爐炭之上
而又置吾于上耶吾以去偽平賊承天子疇庸之命至

於封建車服之制悉有所由豈圖一時之利乃隨波於爾輩也皆却之不納而諸國之主無不咸以父兄事之王加以自奉節儉衣服衾被皆用紬布非公宴惟瓦磚漆器而已恭穆夫人嘗以王寢帳縹裂乃上青絹帳請易之王曰作法於儉猶恐其奢但慮後代皆施錦綉耳此帳雖故猶可蔽風竟不易後庭有鄭氏其父嘗以罪當死左右異其獲宥且言斯人有息女預侍王命出其女而後斬之顧左右曰刑者公柄豈可以一婦而亂我

法耶又嘗夕宴諸王子及諸孫命鼓胡琴未數曲遽止之曰外聞當謂我不恤政事為長夜之飲宴遂罷王自開創以來至於底定而撫字將帥泊行伍莫不盡得其歡心有勲將何逢歿於賊中一日王見其所乘馬悲泣不能止左右莫不感激

論曰王挺命世之才屬艱難之運奮臂起義所向披靡以寡敵衆黃巢不犯其封仗順伐逆漢宏至於授首誅逐帥之薛朗遂申屬郡之禮平作偽之董昌不

違本朝之命加以禦淮戎以耀威奉梁室而示略迴
江山之深險致都邑之宏麗七德克備五福是臻故
八輔地圖三授天冊總四海之戎柄為一人之父師
威名赫然霸業隆矣然後內敦恭儉外正刑賞安民
和衆保定功勲文臺崛起於江東玄德雄據於巴右
比之全德固不足同年而語哉

吳越脩史卷二